

Meeqqat atuarfianni angajullit atuartinneqarnerini MMS imaluunniit nittartakkakut naapittarfikkut tamataqanngitsunik assinik avitseqatigiittarnermut tunngasunik paasissutissiisarneq eqqunneqarnissaannut Naalakkersuisut peqquneqarnissaannut aalajangiiffigisassatut siunnersuut.

Demokraatit Inatsisartunut ilaasortaataannit saqqummiunneqartoq

pillugu

siunnersuutip aappasaaneerreqarnerani

**Kultureqarnermut, Ilinniartitaanermut Ilisimatusarnermut Ilageeqarnermullu
Ataatsimiititaliap**

ISUMALIUTISSIISUTAA

Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Peter P. Olsen, Inuit Ataqatigiit, Siulittaasoq

Inatsisartunut ilaasortaq Nivi Olsen, Demokraatit, Siulittaasup tullia

Inatsisartunut ilaasortaq Vivian Motzfeldt, Siumut

Inatsisartunut ilaasortaq Ineqi Kielsen, Siumut

Inatsisartunut ilaasortaq Mimi Karlsen, Inuit Ataqatigiit

UKA2016-imi ulloq 17. november 2016 siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Meeqqat atuarfianni angajullit atuartinneqarnerini MMS-ikkut imaluunniit nittartakkakut attaveqatigiittarfisigut tamataqanngitsunik assinik avitseqatigiittarnerup ulorianaatigisinnaasaanik paasissutissiisarnerup eqqunneqarnissaa pillugu Naalakkersuisut peqquneqarnissaat siunnersuutikkut kissaatigineqarpoq.

2. Siunnersuutip Inatsisartuni siullermeerneqarnera

Siunnersuut siullermeerinninnermi Inatsisartunit tamanit taparserneqarpoq. Taamaattorli tikkuarneqarpoq MMS-ikkut aamma/imaluunniit internetikkut attaveqatigiittarfitsigut tamataqanngitsunik assinik avitseqatigiittarnermut tunngatillugu ajornartorsiutit avitseqatigiittarnerup pinaveersaartinnissaanut taamaallaat tunngassuteqanngimmata.

3. Ataatsimiititaliap siunnersuummik suliarinninnera

Internetikkut attaveqatigiittarfiit allatullu qarasaasiakkoorlugu allaqatigiittarfiit ineriartornerat ilutigalugu paasissutissanik, tamakku assiuppata, videoliaappata allagaappataluunniit avitseqatigiissinnaaneq ajornarunnaaraluttuinnarpoq. Siunnersuuteqartup uparuaanerat ineriartorneq taanna meeqqanut inuusuttunullu, imminnut misilerartunut qarasaasiakkullu periarfissanik nutaaliaasunik misileraasunut tunngatillugu ulorianartunik arlalinnik nassataqarpoq. Tamataqarani assimik avitseqateqarneq iliuitsitut ajoqusiisinnaanngitsutut meeqqamit inuusuttumilluunniit isigineqarsinnaagaluarpoq, internetili puigorneq ajorpoq. Asseq tiguisumut nutaamut nassiuuneqareerpat nassitseqqaartoq ilisimateqqaarnagu akuersiseqqaarnaguluunniit allanut ingerlateqqinneqartuaannarsinnaavoq. Tamanna aamma tamataqanngitsunik videolianut tunngatillugu atuuppoq. Taamaassimappat videoliat assillu immikkorutaasa ersersinneqarnerat atuartitsinnermi arlaatigut iluaqutaasinnaavoq, taamaattorli saqqummersitseriaatsit taakku marluk inatsisilerinikkut assigiinngissuteqanngillat. Siunnersuutip atuarfimmi atuartitsinnermut kingunissarititaasa assigiimmik paasineqarnissaat qulakkeerniarlugu tamataqanngitsunik assilisaannaanngitsut aammattaarli videoliat pineqarnerisa erseqqissaatigineqarnissaa ataatsimiititaliap isumaliutissiissummini matumani toqqarsimavaa.

Inuup tamataqarani assinganik videoliamilluunniit pineqartoq akuersiseqqaarnagu ingerlatitseqqinneq qaquguluunniit soorunami akuerineqarsinnaalernaviannigilaq, taamaakkaluartorli taamak pisoqartarpoq. Tassunga atatillugu oqaatigineqassaaq siunnersuut taasissutissarlu ataatsimiititaliamit ima paasineqarmata; tassa inuinnaat tamataqaratik assinginik avitseqateqarneq pineqartoq, taamaalillunilu tamataqarani assinik niuerutigalugu avitseqateqartarnermut siunnersuut tunngassuteqanngitsoq. Taamaalilluni ataatsimiititaliap paasinninnera malillugu siunnersuutikkut siunertarineqarpoq, nammineq assinik imaluunniit inuit allat assinginik videolianilluunniit internetikkut attaveqatigiittarfitsigut MMS-ikkulluunniit kammalaatigiit akornanni avitseqatigiittarnerup ulorianaatigisinnaasai pillugit meerartatta inuusuttattalu paasisitsiniaaffiginissaat ilinniartinneqarnissaallu.

Meeraq ukiukitsoq nammineq tamataqarani assiminik allalluunniit assiannik videolianilluunniit avitseqateqarpat, taakku siuliani eqqaaneqareersutut aallaqqaataaniit nassiussivigineqartut saniatigut tiguisunut allanut ingerlateqqinneqarsinnaasarpur. Tassa

innimiillisaarfigineqarnermik “grooming” nalaataqartoqarsinnaavoq – allatut oqaatigalugu avitseqatigiissutigisimasat meeqqanik atonerluisartunit atonerlunneqaratarsinnaaput. Tamatuma saniatigut inuusuttut akornanni taamaattunik avitseqateqarnek nikassaanermik uumisaarinermillu nassataqarsinnaavoq, tamannalu inuusuttumut pineqartumut pisut nalaanni kingornalu inersimasunngoreernermi kingunerluuteqarsinnaavoq.

Tamataqarani assinik videolianillu avitseqatigiittarneq nunat nalinginnaasumik assersuussivigisartakkatta nutaarsiassaqartitsiviini uteqqiattumik sammineqartarpoq. Suliani tamataqarani assinik videolianillu avitseqatigiittarnermut tunngassuteqartuni nunatsinni innuttaasut taamak annertutigisumik akuutinneqartarsorinangillat. Taakku qanorluunniit amerlatigigaluarpata ikitsigigaluarpataluunniit ajornartorsiut ilungersunartuuvoq. Taamaalilluni ataatsimiititaliaq isumaqarpoq suliata qulaani eqqaaneqartutut ittut nunani allanit utuinnarsiuutinngorlutik nalinginnaasunngornissaat utaqqineqartariaqanngitsoq. Taamaammat ataatsimiititaliaq isumaqarpoq siunnersuutip uuma iliuuseqarniarnermik pinaveersaartitsiniarnermillu siunertaqarnera soqutiginaruullunilu tapersersornartuuvoq.

Ataatsimiititaliali isumaa malillugu taaneqartunik avitseqatigiittarnerup ulorianaataanik paasisitsiniaaneq oqallisiginninnerlu atuarfimmi taamaallaat ingerlanneqassanngillat. Internetikkut pitsaasumik pissusilersorneq aammalu internetikkut MMS-ikkullu iliuuserisat kingunerisinnaasai pillugit oqallisiginninneq angajoqqaat meeqqaminnik oqaloqateqarneranni aamma ilaatinneqartariaqarpoq. Qarasaasiatigut attaveqatigeeriaatsit ineriartornerat ilutigalugu ulorianaatillit pillugit meerarisanik oqaloqateqarsinnaaneq angajoqqaat ilaannut ajornakusoorsinnaavoq, taamaattumillu paasisutissanik tunngaveqarluni ilinniartitsissuteqartarnini tunngavigalugu atuarfik tamatumani qitiutinneqartariaqarpoq – tamannarpiaavorlu siunnersuummi matumani siunertarineqartoq.

Ataatsimiititaliap paasinninnera malillugu ilinniartitsineq siunnersuutikkut kissaatigineqartoq assersuutigalugu ‘inuttut ineriartorneq’ pillugu ilinniartitsissutikkut tunngaviummik isigalugu ingerlanneqarsinnaareerpoq. Ullumikkulli piumasagaataanngilaq tamataqanngitsunik assinik avitseqatigiittarnerup ulorianaatai pillugit meeqqat atuarfianni atuartut ilinniartitaanerminnut ilanngullugu pinngitsooratik paasisutissinneqarnissaat. Taamaalilluni siunnersuummik matuminnga akuersissutiginninneq atuarfinni atuartunut angajullernut tunngatillugu inatsimmik allannguinnissamik nassataqartariaqassaaq. Siunnersuut una akuersissutigineqassappat atuarfillu pillugu siunissami inatsisissamut ilanngunneqarluni ataatsimiititaliamit naatsorsuutigineqarpoq ilinniartitsissutissamut kissaatigineqartumut atuartitsinermi atortussanik inerisaanissaq Naalakkersuisut pisussaaffigilissavaat, tak. atuarfik pillugu inatsimmi maanna atuuttumi § 36, imm. 1, nr. 3.

Atuarfik atuarfik pillugu Inatsisartut inatsisaatigut nr. 15, 3. december 2012-imeersukkut pingaarnertigut malittarisassiuunneqarpoq. Ilinniartitsissutissaq kissaatigineqartoq atuarfik pillugu inatsimmik 2017-imi ukiakkut ataatsimiinnermi iluarsaaqqinnissamut naatsorsuutigineqartumut ilanngunniarlugu Naalakkersuisut siunnersuutip siullermeerneqarnerani akissuteqaamminni oqaatigaat. Iluarsaaqqinnissaq taanna ataatsimiititaliamit qilanaarineqarpoq, neriutigineqarlunilu tamatta atuarfiutitta ineriartortinneqarneranik ingerlatsinermik soqutigisallit tamarmik akuutinneqarnissaannik siusinnerusukkut nalunaaruteqarnerminnik Naalakkersuisut attassiinnassasut – tassalu inatsisissatut siunnersuutip inaarutaasumik sularinnginnerani soqutigisaqartunik akuutitsinissaq. Ataatsimiititaliap peqatigitillugu neriutigaa soqutigisallit allat isumasioqatigiinnerni, isummersoqatigiinnerni assigiinngitsuni nalinginnaasumilluunniit allaqatigiinnerni oqaaseqaataasa ilanngussaasalu saniatigut Naalakkersuisut periarfissaq iluatsillugu Inatsisartuni oqallinneq aalajangerinnerillu kissaatigineqartutut iluarsaaqqinnermut tunngavigissagaat.

3.1 Allannguutissatut siunnersuut

Siunnersuutip siullermeerneqarnerani oqaatigineqartutut siunnersuutip taasissutissartaata kalaallisuuata danskisuuatalu akornanni oqaasiliornikkut annikitsumik naapertuutinngitsoqarnera ataatsimiititaliap maluginiarpaa. Ataatsimiititaliap siuliani oqaatigineqartutut tamataqanngitsunik assinik aammalu videolianik avitseqateqartarnerup ulorianaataanut meerartatta inuusuttatalu illersorneqarnissaannut tapertaasussamik iliuuseqarnissamik siunnersuut tapersersorpaa. Taamaattumillu allannguutissatut siunnersuummi matuma kinguliani allassimasumi ataatsimiititaliap tamanna ilannguppaa.

Tamanna tunngavigalugu ataatsimiititaliap isumaqatigiittup allannguutissatut siunnersuut una saqqummiuppaa:

MMS-ikkut imaluunniit internetikkut attaveqatigiittarfitsigut tamataqanngitsunik assinik videolianillu avitseqateqartarnerup ulorianaatai pillugit paasissutissiisarnerup atuarfimmi ukioqatigiiaat angajullit atuartinneqarnerannut aalajangersimasumik ilanngunneqarnissaannik qulakkeerinninnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

4. Siunnersuutip aningaasaqarnikkut kingunerisassai

Inatsisartut Suleriaasianni § 33, imm. 1, malillugu aalajangiiffigisassatut siunnersuutip piviusunngortinneqarnermini aningaasaqarnikkut allaffissornikkullu kingunerisassai siunnersuummut tunngavilersuutini nassuiaatigineqarsimassapput.

Tamanna naapertorlugu siunnersuutip piviusunngortinneqarnerani aningaasaqarnikkut kingunerisassat siunnersuummi nalunaarneqartut ataatsimiititaliap maluginiarpa, taamaalillunilu siunnersuummik piviusunngortitsineq 1 million koruunit pallillugit aningaasartuuteqarnermik nassataqassalluni. Aningaasartuutit taakku atuartsinermut atortussanik pisinermut nutserinermullu atorineqassapput, tamatumalu saniatigut ilinniartitsisut piginnaasatigut qaffassaavigalugit pikkorissaanissamik pisariaqartitsisoqarsinnaavoq. Taamak missingiinerup annertunerusumik oqaaseqarfiginissaa ataatsimiititaliap tunngavissaqarsorinngilaa, soorluttaaq ataatsimiititaliap allannguutissatut siunnersuutaa aningaasaqarnikkut kingunissat allanngornerannik nassataqassasoq ataatsimiititaliamit ilimagineqanngitsoq.


5. Ataatsimiititaliap inassuteqaatai

Ataatsimiititaliap **isumaqatigiittup** allannguutissatut siunnersuut imaattoq saqqummiuppa:

MMS-ikkut imaluunniit internetikkut attaveqatigiittarfisigut tamataqanngitsunik assinik videolianillu avitseqateqartarnerup ulorianaatai pillugit paasissutissiisarnerup atuarfimmi ukioqatigiiaat angajullit atuartinneqarnerannut aalajangersimasumik ilanngunneqarnissaanik qulakkeerinninnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.


Ataatsimiititaliap allannguutissatut siunnersuutaa **akuersissutigineqassasoq** ataatsimiititaliap **isumaqatigiittup** inassutigaa.

Taama oqaaseqarluni isumaliutissiissummilu saqqummiunneqartut paasinnilluni ataatsimiititaliap siunnersuut aappassaaniigassanngortippaa.



Peter Olsen

Siulittaasoq



Nivi Olsen


Siulittaasup tullia



Vivian Motzfeldt



Ineqi Kielsen



Mimi Karlsen